

1412/74

PLEASE DO NOT REMOVE  
CARDS OR SLIPS FROM THIS POOL

---

UNIVERSITY OF TORONTO LIBRARY

---

DS Yao, P'ei-ch'ien  
735 T'ung chien lan yao  
A2Y36  
1761  
v.9-10


East Asia

正編


卷十三 起唐高宗永徽四年  
卷十四 至唐玄宗天寶十五載

通鑑肇要











DS  
735  
A2Y36  
1761  
v. 9-10.

通鑑肇要卷十三 正編

雲間

姚培謙平山

張景星二銘

同錄

同學汪萃宗格齋參閱

高宗皇帝

諱治太宗第九子  
在位三十四年

癸丑永徽四年春二月散騎常侍房遺愛及

高陽公主謀反伏誅遂殺荆王元景吳王

通鑑卷十三 唐高宗

恪

初遺愛尚太宗女高陽公主公主驕恣甚與浮屠辯機等數人私通事覺怨望遂使掖庭令陳立運伺宮省機祥遺愛亦與附馬都尉薛萬徹柴令武謀奉荆王元景爲主以舉事至是公主謀黜遺愛兄遺直封爵使人誣告遺直罪帝令長孫無忌鞠之更獲遺愛及公主反狀司空安州都督吳王恪母隋煬帝女也有文武才太宗常以爲類己欲立爲太子無忌固爭而止恪名望素高爲物情所向無忌深忌之欲因事誅恪以絕衆望遺愛因言與恪同謀冀得免死甲申



詔遣愛萬徹令武皆斬元景恪公主並賜自盡。遺愛立齡子機祥吉凶之先見也。萬徹尚高祖女丹陽公主。令武紹子尚太宗女巴陵公主。

甲寅五年春三月以太宗才人武氏爲昭儀

初蕭淑妃有寵王后疾之帝之爲太子也入侍太宗見才人武氏而悅之太宗崩武氏出爲尼忌日帝詣寺行香見之泣后聞之陰令長髮納之後宮欲以間淑妃之寵武氏巧慧多權數初入宮屈體事后后數稱其美未幾大幸拜爲昭儀后及淑妃寵皆衰

冬十月築長安外郭

雍州叅軍薛景宣上言。漢惠帝城長安。尋晏駕。今復城之。必有大咎。于志寧等以景宣言涉不順。請誅之。帝曰。景宣雖狂妄。若得罪。恐絕言路。赦之。○帝嘗出畋。遇雨。問諫議大夫谷那律曰。雨衣若爲。則不漏。對曰。以瓦爲之。必不漏。帝悅。爲之。

罷獵

以長孫無忌庶子三人爲朝散大夫

王皇后蕭淑妃與武昭儀更相譖訴。會昭儀生女。后憐而弄之。后出。昭儀潛扼

殺之。帝至昭儀，陽歡笑，發被觀之。女已死矣。卽驚啼，問左右。左右皆曰：「皇后適來此。」帝大怒，曰：「后殺吾女。」昭儀因泣訴其罪。后無以自明。帝由是有廢立之志。又恐大臣不從，乃與昭儀幸長孫無忌第，酣飲極懽，拜無忌寵姬子三人，皆爲朝散大夫，仍載金寶繒錦十車，以賜無忌。帝因言：「皇后無子，以諷無忌。」無忌對以他語。帝與昭儀皆不悅而罷。

乙卯 六年秋七月以李義府爲中書侍郎

義府爲中書舍人，爲長孫無忌所惡。左遷壁州司馬。義府問計於中書舍人王

通鑑纂要卷三  
德儉德儉曰帝欲立武昭儀恐宰臣異議君能建策立之則轉禍爲福矣義府然之叩閣表請帝悅留之超拜中書侍郎

### 九月貶褚遂良爲潭州都督

帝欲立武昭儀爲后遂良曰先帝臨崩執陛下手謂臣曰朕佳兒佳婦今以付卿非有大故不可廢也帝不悅而罷明日又言遂良曰陛下必欲易皇后請擇令族何必武氏武氏經事先帝衆所共知萬代之後謂陛下爲何如因置笏於殿階叩頭流血曰還陛下笏乞放歸田里帝大怒命引出昭儀在簾中大言曰



何不撲殺此獠無忌曰遂良受先朝顧命有罪不可加刑他日李勣入見帝問之曰朕欲立武昭儀爲后遂良固執以爲不可事當且已乎對曰此陛下家事何必更問外人帝意遂決衛尉卿許敬宗宣言於朝曰田舍翁多收十斛麥尚欲易婦況天子立一后何豫諸人事而妄生異議昭儀令左右以聞貶遂良爲潭州都督○獠音老西南夷曰獠遂良杭州人故云

冬十月廢皇后王氏爲庶人立昭儀武氏爲皇后

故后王氏淑妃蕭氏並囚別院帝嘗念之。間行至其所呼之。王后泣對曰。至尊若念疇昔。使得再見日月。幸甚。帝曰。朕卽有處置。武后聞之。大怒。遣人斷去手足。投酒甕中。曰。令二嫗骨醉數日而死。

### 以中書侍郎李義府叅知政事

義府容貌溫恭。與人語必嬉怡微笑。而狡險忌刻。故時人謂義府笑中有刀。又以其柔而害物。謂之李猫。

丙辰  
顯慶元年春正月廢太子忠爲梁王立

代王弘爲皇太子

弘武后所生故立之

己未四年夏四月削太尉趙公長孫無忌官

封黔州安置

武后以無忌不助己深怨之會人告太子洗馬韋季方罪勅許敬宗鞠之敬宗因誣奏季方與無忌謀反帝驚曰舅爲小人所間小生疑阻則有之何至於反敬宗曰反狀已具願陛下勿疑帝泣曰朕決不忍加刑於無忌敬宗對曰漢文帝漢之賢主也其舅薄昭止坐殺人帝使公卿哭而殺之後世不以爲非今無

通鑑纂要卷之三  
五  
忌謀移社稷其罪與昭不可同年而語  
陛下少更遷延臣恐變生肘腋悔無及  
矣帝竟不引問詔削無忌官封黔州安  
置秋七月敬宗又遣袁公翰詣黔州再  
鞠無忌反狀逼令自縊○薄昭殺漢使  
者文帝不忍加誅使公卿從之飲酒欲  
使自引昭不肯使羣臣  
臣喪服往哭之乃自殺

庚申五年冬十月初令皇后決百司奏事

帝初苦風眩不能視百司奏事或使皇  
后決之后性明敏涉獵文史處事皆稱  
旨由是始委以政  
事權與人主侔矣



辛酉龍朔元年秋九月徙潞王賢爲沛王

沛王賢聞王勃善屬文召爲修撰勃通之孫也時諸王鬪雞勃戲爲檄周王雞文帝見之怒曰此乃交構之漸斥勃出沛府

冬十月鐵勒犯邊詔武衛將軍鄭仁泰等

將兵擊之明年三月敗鐵勒於天山

卽祁連山

仁泰至天山鐵勒九姓合衆十餘萬以拒之選驍健者數十人挑戰薛仁貴發三矢殺三人餘皆下馬請降軍中歌曰將軍三箭定天山壯士長歌入漢關

甲子麟德元年冬十二月殺同三品上官儀  
梁王忠賜死

初武后召方士郭行真出入禁中爲壘  
祝官人王伏勝發之帝怒召西臺侍郎  
上官儀議之儀指言后專恣不可承宗  
廟帝乃趣使草詔廢之左右馳告后后  
遽從帝自訴帝羞縮不忍復待之如初  
且曰是皆上官儀教我后諷許敬宗誣  
奏儀伏勝與忠謀大逆儀及伏勝皆死  
賜忠死於流所自是政歸房帷天子拱  
手而已四方奏章皆曰二聖每視朝殿  
中垂簾帝與后偶坐生殺賞罰惟所命

乙丑二年冬十月車駕發東都如泰山

壽張人張公藝九世同居帝過壽張幸其宅問其所以能共居之故公藝書忍字百餘以進帝善之賜以縑帛

丁卯乾封二年夏六月以李安期張文瓘並同三品

帝屢責侍臣不進賢安期對曰天下未嘗無賢亦非羣臣敢蔽賢也比來公卿有所薦引爲讒者已指爲朋黨滯淹者未獲伸而在位者先獲罪是以各務杜

通鑑纂要卷三  
口陛下果推至誠以待之其誰不願舉  
所知耶帝深以爲然○時造蓬萊上陽  
合璧等宮頻征伐四夷廐馬萬匹倉庫  
漸虛文瓘諫曰隋鑒不遠願勿使百姓  
生怨帝納其言  
減廐馬數千匹

己總章二年春二月以盧承慶爲司刑太

常伯

時改尚書  
爲太常伯

承慶嘗考內外官有一官督運遭風失  
米承慶考之曰監運損糧考中下其人  
容色自若承慶重其雅量改注曰非力  
所及考中中既無喜容亦無媿詞又改



曰寵辱不驚  
考中上

冬十二月李勣卒

勣功臣也。因請立武。故綱目削其官。

勣寢疾。謂其弟弼曰。我見房杜平生勤苦。僅能立門戶。遭不肖子。蕩覆無餘。吾有此子孫。今悉付汝。謹察視之。其有志氣不倫。交遊非類者。皆先搃殺。然後以問。勣嘗謂人。我年十二三時。爲亡賴賊。逢人則殺。十四五爲難當賊。有所不愜。則殺之。十七八爲佳賊。臨陳乃殺人。二十爲大將。用兵以救人。卒謚貞武。孫敬業襲爵。

定銓注法

大略唐之選法取人以身言書判計資  
量勞而擬官始集而試觀其書判已試  
而銓察其身言已銓而注詢其便利已  
注而唱集衆告之然後類以爲甲先簡  
僕射乃上門下給事中讀侍郎省侍中  
審之不當者駁下既審然後上聞主者  
受旨奉行各給以符謂之告身兵部武  
選亦然課試之法以騎射及翹關負米  
人有格限未至而能試文三篇謂之宏  
詞試判三條謂之拔萃八等者得不限  
而授其黔中嶺南閩中州縣官不由吏  
部委都督選擇士人補授凡居官以年

爲考六品以下四考爲滿有劉曉者上  
疏論之今選曹以檢勘爲公道書判爲  
得人殊不知考其德行才能況書判借  
人者衆矣又吏部取士專用文章爲甲  
乙故天下之士皆捨德行而趨文藝有  
朝登甲科而夕陷刑辟者雖日誦萬言  
何關理體文成七步未足化人取士以  
德行爲先文藝爲末則多士雷奔四方  
風動矣○身體貌豐偉言言詞辯正書  
楷法道美判文理優長上進也讀讀其  
身言書判便利也省視也翹關負米二  
者取士之科也翹關長丈七尺徑三寸  
半凡卜舉後手持關距出處無過一尺  
負米卽負重之說如郭子儀中負米科

是也魏文帝曹丕妒弟植才令七步作詩

壬申咸亨三年夏四月吐蕃遣使入貢

上問以吐蕃風俗對曰吐蕃地薄氣寒風俗朴魯然法令嚴整上下一心議事常自下而起因人所利而行之斯所以能持久也

甲戌上元元年春三月封皇后兄子武承嗣

為周國公元爽之子

秋八月帝稱天皇后稱天后

時帝苦風眩其議使天后攝政中書侍郎同三品郝處俊曰天子理外后理內天之道也昔魏文帝著令雖有幼主不許皇后臨朝所以杜禍亂之萌也陛下柰何以高祖太宗之天下不傳之子孫而委之天后乎中書侍郎李義琰曰處俊之言至忠陛下宜聽之乃止○天后多引文學之士著作郎元萬頃左史劉禕之等使之撰列女傳臣軌百僚新戒樂書凡千餘卷朝廷奏議及百司表疏時密令叅決以分宰相之權時人謂之北門學士

乙亥二年夏四月太子弘中毒卒立雍王賢



爲太子

太后方逞其志太子奏請數逆  
旨酖之賢亦武氏所出故立之

丙子儀鳳元年秋九月以狄仁傑爲侍御史

將軍權善才中郎將范懷義誤斫昭陵  
栢當除名帝命殺之大理丞狄仁傑奏  
罪不當死帝怒令出仁傑曰犯顏直諫  
自古以爲難臣以爲遇桀紂則難遇堯  
舜則易夫法不至死而陛下特殺之是  
法不信於人也人何所措其手足且張  
釋之有言設有盜長陵一杯土陛下何  
以處之今以一栢殺二將軍後代謂陛

下何如主臣不敢奉詔者恐陷陛下於不道且羞見釋之於地下也帝怒稍解二人除名流嶺南擢仁傑爲侍御史

己卯調露元年夏六月遣吏部侍郎裴行儉立波斯王行儉襲執阿史那都支以歸

初西突厥阿史那都支及其別帥李遮匐與吐蕃連和侵逼安西朝議欲發兵討之行儉曰今波斯王卒其子質京師宜遣使送歸道過二虜以便取之可不血刃而擒也帝乃命行儉冊立波斯王過西州揚言須稍涼西上都支覘知之

遂不設備。行儉召四鎮酋長謂曰：昔在此州縱獵，其樂今欲尋舊賞，誰能從者？諸胡子弟爭請行。近得萬人，行儉陽爲畋獵，校勒部伍數日，遂倍道西進，去都支部落十餘里，遣使問其安否。召與相見，都支部計無所出。帥子弟迎謁，遂擒之，簡其精騎進掩遮匐。遮匐亦降，於是囚都支部遮匐以歸，遣波斯王自還其國。○安西四鎮以西域四國爲名，曰龜茲、曰于闐、曰碎葉、曰疎勒。

冬十月，單于府突厥反，遂寇定州。十一月，以裴行儉爲定襄道大總管，擊突厥。明年

三月平之

庚辰永隆元年秋八月廢太子賢爲庶人立

英王哲爲皇太子

辛巳開耀元年秋閏七月徵處士田游巖爲

太子洗馬

游巖隱居泰山帝東封嘗幸其廬徵爲洗馬在東宮無所規益右衛副率蔣儼以書責之曰足下負巢由之峻節傲唐虞之聖主屈萬乘之重申三顧之榮將

以輔導儲貳漸染芝蘭耳皇太子春秋  
鼎盛聖道未明足下唯唯而無一談悠  
悠以卒年歲何以酬塞聖主調護  
之寄乎謹書起予游嚴不能答

壬午永淳元年夏四月聞喜公裴行儉卒

謚曰憲行儉有知人之鑒初王勃與楊  
炯盧照隣駱賓王皆以文章有盛名行  
儉曰士之致遠者當先器識而後才藝  
勃等雖有文華而浮躁淺露豈享爵祿  
之器邪楊子稍沉靜應至令長餘得令  
終幸矣旣而勃墮水炯終於盈川令照  
隣惡疾赴水  
死賓王反誅



秋七月作奉天宮

帝既封泰山欲遍封五岳作奉天宮於嵩山之南監察御史裏行李善感諫不納自褚遂良韓瑗之死中外以言爲諱及善感始諫天下皆喜謂之鳳鳴朝陽

冬十月突厥骨篤祿寇并州薛仁貴大破之

突厥餘黨阿史那骨篤祿等入寇仁貴將兵擊之虜問唐大將爲誰應之曰薛仁貴虜曰吾聞仁貴流象州死久矣何給我也仁貴免胄示之面虜相顧失色

下馬列拜稍稍引去  
仁貴因奮擊大破之

癸未 弘道元年冬十二月帝崩太子哲卽位

帝疾甚夜召裴炎入受遺詔而崩遺詔  
軍國大事有不決者兼取天后進止中  
宗卽位尊天后爲皇  
太后政事咸取決焉

中宗皇帝

諱哲原名顯高宗第七子卽位  
後武后廢爲廬陵王十四年迎

還  
在位  
五年

甲申 嗣聖元年

二月睿宗文明元年  
九月太后光宅元年  
春二月

太后廢帝爲廬陵王立豫王旦

中宗欲以后父韋玄貞爲侍中裴炎固爭中宗怒曰我以天下與玄貞何不可炎懼曰太后密謀廢立太后集百官於乾元殿勸兵宣令廢中宗爲廬陵王扶下殿中宗曰我何罪太后曰汝欲以天下與韋玄貞何得無罪乃幽於別室立旦爲皇帝政事決於太后居睿宗於別殿不得有所預

三月太后殺故太子賢夏四月太后遷帝于房州又遷于均州秋九月太后改元及

服色官名立武氏七廟

改元光宅。旗幟尚白。尚書省爲文昌臺。僕射爲左右相。六曹爲天地四時六官。門下省爲鸞臺。中書省爲鳳閣。侍中爲納言。中書令爲內史。御史臺分爲左右肅政臺。其餘悉以義類改之。

英公李敬業起兵揚州

時諸武用事。唐宗室人人自危。衆心憤惋。會柳州司馬英公李敬業及弟敬猷。唐之奇駱賓王。杜求仁。魏思溫。皆失職。怨望。乃謀起兵。以匡復廬陵王爲辭。復

稱嗣聖元年移檄州縣略曰武氏包藏禍心窺竊神器君之愛子幽之於別宮賊之宗盟委之以重任一抔之土木乾六尺之孤安在試觀今日之域中竟是誰家之天下太后見檄問誰所爲或對曰駱賓王太后曰宰相之過也人有如此才而使之流落不偶乎○抔土指墳墓未乾指高宗墓未久也

冬十月太后殺侍中裴炎以騫味道爲內

史李景諶同平章事

李敬業舉兵太后問計於炎炎對曰皇帝年長不親政事故豎子得以爲辭若



太后反政則不討自平矣武承嗣因使  
監察御史崔詵言炎有異圖太后命左  
肅政大夫騫味道鞠之鳳閣舍人李景  
謏證炎必反斬炎于都亭籍沒其家無  
錡石之儲炎弟子太僕寺丞伯先年十  
七上封事請見言事太后召見詰之曰  
汝伯父謀反尚何言伯先曰臣爲陛下  
畫計耳安敢訴冤陛下爲李氏婦先帝  
棄天下遽攬朝政變易嗣子踈斥李氏  
封崇諸武臣伯父忠於社稷反誣以罪  
戮及子孫陛下所爲如是臣實惜之陛  
下早宜復子明辟高枕深居則宗族可  
全不然天下一變不可復救矣  
太后怒命於朝堂杖而流之

李敬業取潤州將軍李孝逸擊破之

敬業起兵太后遣孝逸將兵三十萬討之追削其祖考官爵發冢斲棺復姓徐氏至是敬業攻潤州孝逸軍數戰不利懼欲引退殿中侍御史魏元忠與行軍記室劉知柔言於孝逸曰風順荻乾此火攻之利因請決戰孝逸進擊之因風縱火敬業大敗其將王那相斬敬業及駱賓王首來降

乙酉二年太后垂拱元年春三月太后遷帝於房州

冬十月太后以僧懷義爲白馬寺主

太后託言懷義有巧思使人宮營造補闕王求禮表請闕之表寢不出。懷義本姓馮名小寶因高祖女千金公主以進得幸於太后太后欲令出入禁中乃度爲僧又以其家寒微令與尚太平公主薛紹合族命紹以季父事之

丙戌  
三年春三月太后置銅匱受密奏

太后疑天下人多圖己欲大誅殺以威之乃盛開告密之門有魚保家者請鑄銅爲匱以受天下密奏其器一室四隔上各有竅可入不可出太后善之未幾其怨家投匱告保家嘗爲李敬業作兵器遂伏誅索元禮周興來俊臣之徒網

羅無辜中外畏之甚於虎狼麟臺正字  
陳子昂屢上疏諫不聽又曰天下有危  
機禍福因之而生百姓是也百姓安則  
樂其生不安則輕其死輕其死則天下  
亂矣

戊子五年秋八月琅邪王冲越王貞舉兵匡  
復不克而死太后遂大殺唐宗室

時狄仁傑爲豫州刺史貞黨當坐者六  
七百家當籍沒者五千口仁傑密奏被  
皆誑悞臣欲顯奏似爲逆人申理不言  
又乖陛下仁恤之旨太后特原之皆流

豐州○貞太

宗子冲貞子

已六年

太后永昌元年

閏九月太后殺同平章事

魏玄同

玄同素與裴炎善時人以其終始不渝  
謂之耐久朋周興奏誣玄同言太后老  
矣不若奉嗣君爲耐久太后怒賜死于  
家監刑御史房濟謂玄同曰丈人何不  
告密冀得召見可以自陳玄同嘆曰人  
殺鬼殺亦復何殊豈能作告密人邪乃  
就死



庚寅七年

周武氏天授元年

春正月太后始用周正

改元曰載初以十一月爲正月十二月爲臘月來歲正月爲一月

武氏自名嬰改詔曰制

鳳閣侍郎宗秦客改造十二字以獻照爲墨天爲酉地爲舉日爲回月爲回星爲○君爲庶臣爲忠載爲庶初爲胤年爲垂正爲正

除唐宗室屬籍

從司刑少卿周興之奏也

二月太后策貢士於洛城殿

貢士殿試自此始補闕薛謙上疏曰今之選人咸稱覓舉奔競相尚誼訴無慙至於才應經邦惟令試策武能制敵止驗彎弓昔司馬相如不堪公卿之任吳起曰臨難決疑一劍之任非將事也然則虛文豈足以佐時善射豈足以克敵要在文吏察其行能武吏觀其勇略考居官之臧否行舉者之賞罰而已

### 秋七月以侯思止王弼義爲侍御史

思止將軍高元禮僕素詭譎無賴告恒州刺史裴貞與舒王元名謀反擢爲游擊將軍時告密者往往得五品官思止史太后曰卿不識字豈堪御史

對曰獬豸何嘗識字但能觸邪耳太后  
悅從之弘義素無行見閭里耆老作邑  
齋告以謀反殺二百餘人擢授游擊將  
軍俄遷殿中侍御史或告勝州都督王  
安仁謀反敕弘義按之安仁不服卽於  
柳上刎其首朝士人人自危道路以目  
時法官競爲深酷惟司刑丞徐有功杜  
景儉獨存平恕被告者皆曰遇來侯必  
死遇徐杜必生司刑丞李日知亦尚平  
恕少卿胡元禮欲殺一囚日知以爲不  
可往復數四元禮怒曰元禮不離刑曹  
此囚終無生理日知曰日知不離刑曹  
此囚終無死法竟以  
兩狀列上日知果直

八月太后殺南安王顥等十二人及故太

子賢二子

唐之宗室於是殆盡其幼弱者亦流嶺南

九月武氏改國號曰周稱皇帝以豫王旦

爲嗣改姓武氏

侍御史傅遊藝上表請改國號曰周賜皇帝姓武氏太后可之立武氏七廟追尊周文王爲始祖文皇帝祖考皆爲皇帝妣皆爲皇后立武承嗣三思等皆爲

王以遊藝爲鸞臺侍郎平章事遊藝期  
年之中歷衣青綠朱紫時人謂之四時  
仕宦

### 冬十月周改置宗廟

改唐太廟爲享德廟  
以武氏七廟爲太廟

### 辛卯八年春正月周改置社稷旗幟尚赤二 月周流其右丞周興於嶺南

初金吾大將軍卽神勣以罪誅或告興  
與神勣通謀太后命來俊臣鞠之俊臣



與興方推事對食謂興曰囚多不承當  
爲何法興曰此甚易耳取大囊以炭四  
周炙之令囚入中何事不承俊臣索大  
囊如興法起謂興曰有內狀推兄請兄  
入此囊興惶惶恐服罪法當死原  
之流嶺南在道爲仇家所殺

### 秋九月周以狄仁傑同平章事

太后謂仁傑曰卿在汝南甚有善政卿  
欲知譖卿者名乎仁傑謝曰陛下以臣  
爲過臣請改之知臣無過臣之幸  
也不願知譖者名太后深嘆美之

### 冬十月周殺其同平章事格元輔右相岑

# 長倩納言歐陽通

先是鳳閣舍人張嘉福使洛陽人王慶之等數百人以上表請立武承嗣爲皇太子元輔長倩以皇嗣在東宮不宜有此議由是大忤諸武意誣以反誅來俊臣訊通五毒備至終無異詞乃詐爲通歟并殺之慶之見太后太后曰皇嗣我之子奈何廢之對曰神不歆非類民不祀非族今誰有天下而以李氏爲嗣乎太后不從慶之屢求見太后怒命鳳閣侍郎李昭德杖之昭德引慶之出光政門以示朝士曰此賊欲廢我皇嗣立武承嗣命撲之耳目皆血出然後杖殺之其

黨乃散昭德因言於太后曰天皇陛下  
之夫皇嗣陛下之子陛下身有天下當  
傳之子孫爲萬代業豈得以姪爲嗣乎  
自古未聞姪爲天子而爲姑立廟者也  
且陛下受天皇顧託若以天下與承  
嗣則天皇不血食矣太后亦以爲然

壬辰九年

周如意元年  
再改長壽

春一月周武氏引見

存撫使所舉人

無問賢愚悉加擢用高者試鳳閣舍人  
給事中次試員外郎侍御史補闕拾遺  
校書郎試官自此始時人爲之語曰補  
闕連車載拾遺平斗量權推侍御史筮

脫校書郎有舉人沈全交續之曰麴心  
存撫使眯目聖神皇御史劾之太后笑  
曰使卿輩不濫何惜人言太后雖濫  
以祿位收天下人心然不稱職者尋亦  
黜之或加刑誅挾刑賞之柄以駕御天  
下政由已出明察善斷故當時英賢亦  
競爲之用○櫪四齒杷也言用官之泛  
如用杷齒推聚之多盥脫言官不得人  
如模脫盥杯  
箇箇相似也

### 周貶狄仁傑魏元忠等爲縣令

來俊臣羅告任知古狄仁傑裴行本崔  
宣禮盧獻魏元忠李嗣真謀反先是俊

臣請降勅一問卽承反者得減死知古等下獄俊臣以此誘之仁傑曰大周革命萬物維新唐室舊臣甘從誅戮反是實俊臣乃少寬之侯思止鞠元忠元忠辭氣不屈思止怒命倒曳之元忠曰我薄命譬如墜驢足絀於鎗爲所曳耳思止愈怒更曳之元忠曰侯思止汝若須魏元忠頭則截取何必使承反也仁傑旣承反裂衾帛書冤狀置綿衣中謂判官王德壽曰天時方熱請授家人去其綿德壽許之仁傑子得書持之稱變以聞太后以問俊臣俊臣乃詐爲仁傑等謝死表上之初平章事樂思晦亦爲俊臣等所殺其男至是上變太后召見問



狀對曰臣父已死臣家已破但惜陛下  
法爲俊臣等所弄陛下不信臣言乞擇  
朝臣之忠清陛下素所信任者爲反狀  
以付俊臣無不承反矣太后意稍寤召  
見仁傑等問曰卿承反何也對曰不承  
則已死於拷掠矣太后曰何爲作謝死  
表對曰無之出表示之乃知其  
詐於是出此七族皆貶縣令

秋八月周左相武承嗣罷以李昭德同平

章事

昭德密言於太后曰承嗣權太重太后  
曰吾姪也故委以腹心昭德曰姑姪之

通鑑卷三  
親何如父子子猶有篡弑其父者況姪乎太后矍然遂罷承嗣政事承嗣亦毀昭德於太后太后曰吾任昭德始得安眠此代吾勞汝勿言也

### 周流其御史嚴善思於驩州

太后任用酷吏誅唐宗室貴戚數百人次及大臣數百家其刺史郎將以下不可勝數每除一官戶婢竊相謂曰鬼朴又來矣不旬月輒遭掩捕族誅善思公直敢言時告密者不可勝數太后亦厭其煩命善思按問引虛伏罪者八百五十餘人羅織之黨爲之不振乃相與搆陷善思坐流驩州太后知其枉尋復召

爲渾儀

監丞

癸巳十年春一月周以婁師德同平章事

師德寬厚清慎犯而不校其弟除代州刺史將行師德謂曰吾備位宰相汝復爲牧州榮寵過盛人所疾也將何以自免弟長跪曰自今雖有人唾某面某拭之而已庶不爲兄憂師德愀然曰此所以爲吾憂也人唾汝面怒汝也汝拭之乃逆其意所以重其怒夫唾不拭自乾當笑而受之

周殺其尚方監裴匪躬

匪躬坐私謁皇嗣腰斬於市又有告皇  
嗣潛有異謀者太后命來俊臣鞠其左  
右太常工人安金藏大呼曰請剖心以  
明皇嗣不反卽引佩刀自剖其胸五臟  
皆出太后聞之令輦入宮使醫縫之經  
宿始藉太后親臨視之嘆曰吾有子不  
能自明使汝至此卽命俊  
臣停推睿宗由是得免

甲午

十一年

周延載元年

冬十一月周明堂火

太后命懷義作天堂日役萬人費以億  
計時御醫沈南珍亦得幸於太后懷義  
心愾是夕密燒天堂延及明堂皆盡太  
后恥而諱之但云工徒誤燒命更造明

堂天堂仍以懷義充使又鑄銅爲九州  
鼎及十二神皆高一丈各置其方懷義  
內不自安言多不順  
太后陰使人毆殺之

乙未

十二年

周天冊萬歲元年

秋九月周武氏自號

天冊金輪大聖皇帝冬十二月周安平王

武攸緒棄官隱嵩山

攸緒恬淡寡欲棄官隱于嵩山之陽優  
游巖壑冬居茅椒夏居石室太后所賜  
及王公所遺野服器玩皆置之  
不用買田使奴耕種與民無異

唐中宗

唐中宗

唐中宗



丙  
中十三年

周萬歲通  
天元年

冬十一月周以張昌

宗爲散騎常侍張易之爲司衛少卿

昌宗易之年少美安容善音律太平公  
主薦之入侍禁中皆得幸於太后常備  
朱粉衣錦繡武承嗣三思皆候其門庭  
爭執鞭撻謂易之爲五郎昌宗爲六郎

丁酉十四年

周神功  
元年

夏六月周來俊臣伏誅

俊臣前後羅織誅人不可勝計諸武及  
太平公主共發其罪繫獄有司處以極  
刑及棄市仇家爭噉其肉斯須而盡抉  
眼剥面拔腹出心騰蹋成泥土民相賀

於路曰自今眠  
者背始帖席矣

# 秋九月周以魏元忠爲肅政中丞

太后謂侍臣曰頃者周興來俊臣按獄  
多連引朝臣云其謀反朕使近臣就獄  
引問皆自承服朕不復疑自興俊臣死  
不復聞有反者然則前死者不有冤邪  
夏官侍郎姚元崇對曰自垂拱以來坐  
謀反死者率皆興等羅織陛下使近臣  
問之近臣亦不自保何敢動搖賴天啟  
聖心興等伏誅臣以百口爲陛下保自  
今內外之臣無復反者矣時多爲元忠  
訟寃太后復召爲肅政中丞元忠前後

坐棄市流竄者四嘗侍宴太后問曰卿  
往者數負謗何也對曰臣猶鹿耳羅織  
之徒欲得臣肉爲  
義臣安所避之

### 冬閏十月以狄仁傑同平章事

仁傑上疏曰方外絕域得其人不足增  
賦獲其土不可耕織但當敕邊兵謹守  
備遠斥候聚資糧待其自致然後擊之  
以逸待勞則戰士力倍以土禦客則我  
得其便可使二虜不擊而服矣事雖  
不行識者是之○二虜突厥吐蕃也

戊戌

十五年

周聖歷元年

春三月帝還東都

張易之嘗問自安計狄仁傑曰惟勸迎  
廬陵王可以免禍會后欲以武三思爲  
太子以問宰相衆莫敢對仁傑曰臣觀  
天人未厭唐德比匈奴犯邊陛下使梁  
王三思募勇士踰月不及千人廬陵王  
代之不浹日輒五萬今欲繼統非廬陵  
王莫可后怒罷議久之召謂曰朕數夢  
雙陸不勝何也於時仁傑與王方慶俱  
在二人同辭對曰雙陸不勝無子也天  
其意者以儆陛下乎且姑姪與子母孰  
親陛下立廬陵王則千秋萬歲後常享  
宗廟三思立廟不祔姑后感悟○易之  
兄弟思自全問吉項計安出項曰吾有  
不朽策願效之非止保身且世世不絕

昨主上春秋高武諸王非海內屬意公  
盍從容請立廬陵王以副人望易弔爲  
賀之資也易之昌宗乘間如頊教后意  
乃定己已召廬陵王於房州承嗣怏怏  
遂發病死○雙陸博具一說太后夢大  
鸚鵡兩翼皆折以問仁傑仁傑曰武者  
陛下之姓兩翼二子也陛下起二子則  
兩翼振矣由是無立承嗣三思之意

# 秋八月周以狄仁傑兼納言

太后命宰相各舉尚書郎一人仁傑舉  
其子光嗣拜地官員外郎已而稱職太  
后喜曰卿足繼祁奚矣通事舍人元行  
冲博學多通仁傑重之行冲數規諫仁



傑且曰凡爲家者必有儲蓄脯鹽以適口參朮以攻疾僕竊計明公之門珍味多矣行冲請備藥物之末仁傑笑曰吾藥籠中物何可一日無也○春秋晉祁奚請老舉其子祁午以自代

九月周武氏以帝爲皇太子河北道元帥狄仁傑副之以討默啜

星嗣果請遜位於廬陵王太后許之立爲太子復名顯賜姓武突厥默啜寇檀等州命太子討之先是募人月餘不滿千人及聞太子爲帥應者雲集未幾數

盈五萬時太子不行命仁傑知元帥事王及善請太子赴外朝以慰人心從之突厥盡殺所掠男女而去仁傑追之不及默噉還漢北擁兵四十萬據地萬里西北諸夷皆附之有輕中國之心

### 周以蘇味道同平章事

味道在相位依阿取容嘗謂人曰處事不宜明白但摸稜持兩端可矣時人謂之蘓摸稜○稜門櫪也四方木摸之可左可右

冬十月周以姚元崇同平章事十一月周

以豫王旦爲相王十二月周以魏元忠同  
平章事

己亥十六年秋八月周納言婁師德卒

狄仁傑未輔政師德薦之及同列數擠  
令外使太后覺問仁傑曰師德賢乎對  
曰爲將謹守賢則不知也又問知人乎  
對曰臣嘗同僚未聞其知人也太后曰  
朕用卿師德薦也出其奏仁傑慙已而  
嘆曰婁公盛德我爲所容爲將相者三  
十年恭勤樸恕心無適莫與郝  
處俊相亞世之言長者稱婁郝

庚子十七年

周久視元年

夏六月周以張易之爲

奉宸令

太后改控鶴監爲奉宸府以易之爲令  
每內殿曲宴輒引諸武易之昌宗飲博  
嘲謔又多選美少年爲奉宸內供奉右  
補闕朱敬則諫曰陛下內寵有易之昌  
宗足矣近聞右監門衛長史侯祥等明  
自媒銜醜慢不恥求爲供奉無禮無儀  
濫干朝聽臣職在諫諍不敢不奏太后  
勞之曰非卿直言朕不知此賜綵百端

秋九月司空梁公狄仁傑卒

謚文惠

太后信重仁傑謂之國老而不名及薨太后泣曰朝堂空矣仁傑嘗薦張柬之姚元崇桓彥範敬暉等數十人卒成反正之功或謂仁傑曰天下桃李盡在公門矣仁傑曰薦賢爲國非爲私也

冬十月周復以正月爲歲首

辛丑

十八年

又大足元年

春三月雨雪

蘇味道以雪爲瑞帥百官入賀殿中侍御史王求禮止之曰三月雪爲瑞雪臘月雷爲瑞雷乎味道不從旣入求禮獨不賀進言曰今陽和布氣而寒雪爲災



通鑑纂要卷三  
豈得以爲瑞賀者皆諂諛之士也太后爲之罷朝

壬寅十九年春正月帝在東宮

是歲蘓安恒復上疏曰太子年德俱盛陛下貪其寶位而忘子母深恩不知鐘鳴漏盡天意人事還歸李家物極則返器滿則傾臣何惜一朝之命而不安萬乘之國哉太后亦不之罪

癸卯二十年秋九月周貶魏元忠爲高要尉

流張說於嶺南

時昌宗易之二張勢傾朝廷元忠嘗奏  
曰臣承乏宰相不能盡忠死節使小人  
在君側臣之罪也易之等恨怒共譖元  
忠謀挾太子爲耐久朋遂下制獄昌宗  
乃命張說爲證說僞許之太后召元忠  
與昌宗參對往復不決昌宗曰張說聞  
元忠言太后召說鳳閣舍人宋璟謂說  
曰名義至重鬼神難欺不可黨邪陷正  
以求苟免左史劉知幾曰無汗青史爲  
子孫累及入太后問之說未對昌宗從  
旁迫趣說使速言說曰在陛下前猶逼  
臣如是况在外乎臣實不聞元忠有是  
言易之昌宗遽呼曰說與元忠同反說  
嘗謂元忠爲伊周夫伊尹放太甲周公

攝王位此反狀甚明說曰易之昌宗安知伊周伊尹周公歷古爲忠臣陛下用宰相不使學伊周將何效焉竟貶元忠爲高要尉流說嶺表元忠入辭言曰臣老向嶺南十死一生但陛下他日必思臣言因指昌宗易之曰此二小兒終爲亂階

甲辰二十一年秋七月周以楊再思爲內史

再思爲相專以諂媚取容戴令言賦兩腳狐以譏之出爲令張易之兄同休請公卿宴集酒酣戲再思曰內史面似高麗再思欣然剪紙帖巾反披紫袍爲高

麗舞滿座鄙笑張昌宗以姿貌倖冉思  
每曰人言六郎似蓮花非也正蓮花似  
六郎  
耳

九月周以姚元之爲靈武道安撫大使冬  
十月以秋官侍郎張柬之同平章事

元之將行太后令舉外司堪爲宰相者  
對曰張柬之沈厚有謀能斷大事且其  
人已老惟陛下急用之太后遂以柬之  
同平章事時年且八十矣○元崇字元  
之時突厥叱列元  
崇反故以字行

乙巳神龍元年春正月張柬之等舉兵討武氏之亂張易之昌宗伏誅帝復位

太后疾甚昌宗易之居中用事柬之與天官侍郎崔玄暉中臺右丞敬暉司刑少卿桓彥範相王司馬袁恕已及羽林大將軍李多祚羽林將軍楊元琰李湛左威衛將軍薛思行等帥羽林兵五百餘人詣東宮迎太子斬關而入斬易之昌宗於廡下進至太后所寢長生殿太后見太子曰乃汝邪小子旣誅可還東宮彥範進曰天意人心久思李氏願陛下傳位太子以順天人之望於是以太

后制命太子監國明日傳位於太子中宗復位

遷太后於上陽宮上尊號曰則天大聖皇帝。以張柬之袁恕己同三品崔玄暉爲內史敬暉桓彥範爲納言李多祚等進爵有差二月復國號曰唐。復立韋氏爲后

帝之遷房陵也與后同幽閉備嘗艱危情愛甚篤嘗與后私誓曰異時幸復見天日當惟卿所欲不相禁御至是帝每臨朝則后必施帷帳坐於殿上預聞朝



政如武后在高宗之世納言桓彥範上表曰書稱牝雞之辰惟家之索自古帝王未有與婦人共政而不破國亡身者也願令皇后專居中宮治陰教勿干國政先是胡僧慧範與張易之兄弟善后亦重之至是復出入宮掖彥範表言慧範執左道以亂政請誅之帝皆不聽○辰作晨索盡也喻婦人知外事雌代雄

鳴則家盡

# 以武三思爲司空

張柬之桓彥範誅張易之昌宗而不殺三思洛州長史薛季昶勸曰二凶雖除

產祿猶在。去草不去根。終當復生。彥範曰。三思。机上肉爾。朝邑尉劉幽求曰。三思尚存。公等無葬地。若不早計。後且噬臍。不從。帝女安樂公主適三思子崇訓。上官儀女孫婉兒者。沒入掖庭。辯慧能文。明習吏事。太后愛之。及帝卽位。使掌制命。拜爲婕妤。三思通焉。故婉兒黨於武氏。又薦三思於韋后。帝使后與三思雙陸。而自爲點籌。三思遂與后通。由是武氏之勢復振。東之等數勸帝誅諸武。不聽。東之等或撫床嘆憤。或彈指出血。曰。主上昔爲英王時。稱勇烈。吾所以不誅諸武者。欲使帝自誅之。以張天子之威耳。今反如此。知復奈何。○呂產呂祿。

漢高后時皆以外戚居中用事以喻三思也噬臍齧臍腹喻不可及也

# 夏五月賜敬暉等五人王爵罷其政事

敬暉等畏武三思之讒以考功員外郎崔湜爲耳目湜見帝親三思乃悉以暉等謀告三思與鄭愔爲三思謀主三思與韋后日夜譖暉等恃功專權將不利於社稷帝封敬暉爲平陽王桓彥範爲扶陽王張柬之爲漢陽王袁恕己爲南陽王崔立暉爲博陵王皆罷政事三思令百官修復太后之政不附武氏者斥之爲五王所逐者復之大權盡歸三思矣

冬十一月皇太后武氏崩

年八十二。遺制去帝號。赦王蕭二族及褚遂良韓瑗柳奭親屬。帝居諒陰。以中書令魏元忠攝冢宰三日。元忠素負忠直之望。中外賴之。武三思矯太后遺制。慰諭元忠。賜實封百戶。元忠捧制感咽涕泗。見者曰。事去矣。○知其不敢復論武氏事矣。

丙午二年秋七月立衛王重俊爲皇太子。  
敬暉桓彥範張柬之袁恕己崔玄暉爲武

### 三思所殺

三思陰令人疏皇后穢行。勝於天津橋。請加廢黜。帝大怒。命李承嘉窮覈其事。承嘉奏言。敬暉等使人所爲。請族誅之。帝可其奏。大理丞李朝隱奏稱。暉等未經推鞠。不可遽就誅夷。乃長流暉等。崔湜說三思遣使矯制殺之。乃以周利用攝右侍御史。奉使嶺外。比至。東之。立暉已死。遇彥範於貴州。令縛之。曳於竹槎之上。肉盡至骨。然後杖殺。得暉尚而殺之。恕已素服黃金。利用逼之。使飲野葛汁。盡數升不死。不勝毒憤。培地爪甲殆盡。仍捽殺之。三思旣殺五王。勢傾人主。

常言曰。我不知何等名善人。惟與我善者是矣。時宗楚客。宗晉卿。卿紀處訥。甘元東。爲三思羽翼。利用冉祖雍。宋之遜。李俊。姚紹之。爲三思耳目。時人謂之五狗。冬十一月。以竇從一爲雍州刺史。

太平公主與僧寺爭碾磴。雍州司戶李元紘判歸僧寺。從一懼。命改判。元紘大署判後曰。南山可移。此判無動。從一不能奪。○從一舊名懷貞。碾女箭反。磴。五對反。皆磨屬所。以礪穀出米者。

丁未景龍元年秋七月。太子重俊起兵討武



### 三思武崇訓兵潰而死

皇后以重俊非其所生惡之三思尤忌太子上官婕妤以三思故每下制勅推尊武氏駙馬崇訓又教安樂公主請廢太子太子積不能平與李多祚等矯制發羽林軍殺三思崇訓於其第太子與多祚斬關而入叩閣索上官婕妤帝乃與韋后安樂公主上官婕妤登立武門樓以避之帝俯謂多祚所將千騎曰汝輩皆朕宿衛之士何爲從多祚反苟能斬反者勿患不富貴於是千騎斬多祚等餘衆皆潰太子亦爲左右所殺帝以其首獻太廟及武三思崇訓之柩然後

梟之朝堂從宗  
楚客之請也

戊申二年秋七月始用斜封墨勅除官

安樂長寧公主上官婕妤等皆依勢用  
事請謁受賕降墨勅除官斜封付中書  
時人謂之斜封官。不用  
硃印曰墨不用正封曰斜

巳酉三年春三月以宗楚客爲中書令崔湜

同平章事

監察御史崔琬對仗彈楚客潛通戎狄  
受其貨賂致生邊患故事大臣被彈俯

倭趨出立於朝堂待罪至是楚客更忿怒作色自陳忠鯁爲琬所誣帝竟不窮問命琬與楚客結爲兄弟以和解之時人謂之和事天子提通於上官昭容故引以爲相時政出多門濫官充溢人以爲三無坐處謂宰相御史及員外官也

庚戌

四年

睿宗景雲元年

夏五月宴近臣

國子祭酒祝欽明自請作八風舞搖頭轉目備諸醜態吏部侍郎盧藏用曰祝公五經掃地盡矣

六月皇后韋氏弑帝立溫王重茂

中宗之子

許州參軍燕欽融上言皇后淫亂干政  
宗楚客圖危社稷帝面詰之欽融抗言  
不撓楚客矯制撲殺之帝意怏怏由是  
后及其黨始懼安樂公主亦欲后臨朝  
以己爲皇太女乃相與合謀於餅餽中  
進毒中宗崩於神龍殿太平公主與上  
官昭容謀草遺制立重茂爲太子皇后  
臨朝攝政改元唐隆太子卽位年十六  
楚客勸后遵武后故事以韋氏子弟領  
南北軍深忌相王及太平公主謀去之  
臨淄王隆基起兵討韋氏並其黨皆伏誅

相王子臨淄王隆基陰聚才勇之士密  
謀匡復會兵部侍郎崔日用以宗楚客

謀告隆基乃與太平公主及前朝邑尉  
劉幽求等謀先事誅之微服與幽求等  
入苑中逮夜勒兵入立武門諸衛兵皆  
應之斬韋后及安樂公主上官昭容遂  
迎相王入輔少帝收捕諸韋親黨  
及楚客等斬之封隆基爲平王

相王旦卽位廢重茂復爲溫王立平王隆  
基爲皇太子

帝將立太子以宋王成器嫡長平王隆  
基有功疑不能決成器辭曰國家安則  
先嫡長危則先有功苟違其宜四海失  
望臣死不敢居平王之上涕泣固請者

累日劉幽求曰平王拯社稷之危救君親之難論功語德無可疑者帝從之

以姚元之宋璟同三品

璟與元之協心革中宗弊政進忠良退不肖紀綱修舉當時翕然以為復有貞觀永徽之風

睿宗皇帝

諱旦高宗第八子在位二年

辛亥景雲二年春正月以郭元振張說同平章事二月命太子監國以宋王成器為同



州刺史幽王守禮爲幽州刺史太平公主

蒲州安置

太平公主以太子年少英武與益州長史竇懷貞結黨欲危太子帝嘗密召韋安石謂曰聞朝廷皆傾心東宮宜察之對曰陛下安得亡國之言此乃太平之謀耳願陛下無惑帝瞿然曰朕知之矣公主又嘗乘輦邀宰相於光範門內諷以易置東宮宋璟抗言曰東宮有大功於天下真宗廟社稷之主柰何忽有此議與姚元之密言於帝曰宋王陛下之元子幽王高宗之長孫公主交構其間

將使東宮不安請出宋王。幽王皆爲刺史。太平公主武攸暨皆於東都安置。帝曰。朕惟一妹。豈可遠置東都。諸王惟卿所處。頃之。帝謂侍臣曰。術者言五日中午當有急兵入宮。卿等爲朕備之。張說曰。此必姦人欲離間東宮。願陛下早使太子監國。則流言自息矣。元之曰。張說所言社稷之至計也。帝悅。於是出二王爲二州刺史。公主蒲州安置。命太子監國。

貶姚元之爲申州刺史。宋璟爲楚州刺史。寢二王刺史之命。

太平公主聞元之璟謀大怒以讓太子  
太子奏二人離間姑兄故有是命又召  
太平公主  
還京師

### 夏六月置十道按察使

各糾察所部刺史以下  
惡○按察使之名始此

### 冬十二月召司馬承禎至京師尋許還山

承禎天台道士帝問以陰陽術數對曰  
道者損之又損以至於無爲安肯勞心  
以學術數乎帝曰理身無爲則高矣如  
理國何對曰國猶身也順物自然而心

無所私則天下理矣承禎固請還山帝  
許之尚書左丞盧藏用指終南山謂承  
禎曰此中大有佳處何必天台承禎曰  
此仕宦之捷徑耳藏用嘗隱終南則天  
時徵爲左拾遺  
故承禎言之

壬子太極元年

玄宗先天元年

秋八月帝傳位於太

子皇太子隆基卽位尊帝爲太上皇

通鑑掣要卷十三

漢書卷三

卷三

漢書卷三

漢書卷三

漢書卷三

漢書卷三

漢書卷三

漢書卷三

漢書卷三

漢書卷三

通鑑肇要卷十四 正編

張景星二銘

雲間

同錄

姚培謙平山

同學馮 浩養吾參閱

玄宗明皇帝

諱隆基睿宗第三子  
在位四十四年

癸丑開元元年秋七月太平公主謀逆賜死

蕭至忠岑羲竇懷貞崔湜伏誅



太平公主依上皇之勢擅權用事宰相  
七人五出其門文武之臣大半附之與  
懷貞義至忠湜及僧慧範等謀廢立荆  
州長史崔日用入奏事言於帝曰太平  
謀逆有日萬一姦先得志悔之何及帝  
曰誠如卿言直恐驚動上皇日用曰天  
子之孝在於安四海若姦人得志則社  
稷爲墟安在其爲孝乎請先定北軍後  
收逆黨則不驚動上皇矣帝乃與岐王  
範薛王業郭元振王毛仲姜皎李令問  
王守一內給事高力士等定計以兵三  
百餘人入虔化門執至忠義斬之懷貞  
逃入溝中自縊死戮其尸上皇聞變登  
承天門樓元振奏皇帝前奉詔誅竇懷

貞等無他也。上皇乃下詔。自今軍國政  
刑一皆取皇帝處分。太平公主逃入山  
寺。三日乃出。賜死。公主諸子及黨與死  
者數十人。湜與盧藏用俱坐私侍公主。  
流嶺南。尋以湜與逆謀。追賜死。初太平  
公主與湜等謀廢立。陸象先獨以爲不  
可。公主曰。廢長立幼。已爲不順。且又失  
德。若之何。不去。象先曰。旣以功立。當以  
罪廢。今實無罪。象先終不敢從。帝旣誅  
懷貞等。召象先謂曰。歲寒知松栢信哉。  
以宦者高力士爲右監門將軍。知內侍省  
事。

初太宗定制內侍省不置三品官黃衣廩食守門傳命而已帝在藩邸力士傾心奉之至是宦官增至三千人除三品將軍者甚多宦官之盛自此始

以張說爲中書令冬十月以姚元之同三品

元之爲相請抑權倖愛爵賞納諫諍卻貢獻不與羣臣褻狎帝皆納之元之嘗奏請序進郎吏帝仰觀殿屋終不應元之懼趨出罷朝高力士諫曰陛下新總萬幾宰臣奏事當面加可否柰何一不省察帝曰朕任元之以庶政大事當奏

開共議之。郎吏卑秩。乃以煩猥邪聞者皆服帝識人君之體

## 十二月改官名

僕射爲丞相。中書爲紫薇省。門下爲黃門省。侍中爲監。長史爲尹。司馬爲少尹。以姚崇爲紫微令。張說爲相州刺史。

初帝欲相崇。說疾之。使御史大夫趙彥昭殿中監姜皎彈之。帝曰。此張說之意。汝何得面欺崇。旣相說懼。乃潛詣岐王申款。他日崇對於便殿。行微蹇。帝問有足疾乎。對曰。臣有心腹之疾。帝問其故。對曰。岐王陛下愛弟。說爲輔臣。而密乘

車入王家。恐爲所誤。故憂之。遂左遷。說  
爲相州刺史。姚崇本名元崇。字行之。  
武后長安四年。命以字  
行。今復舊名。而省元字。

甲寅二年春正月置左右教坊

舊制雅俗之樂皆隸太常。帝以太常禮  
樂之司不應典倡優雜伎。乃更置左右  
教坊。以教俗樂。又選樂工宮女數百人  
自教之。謂之皇帝梨園弟子。倡優女  
樂也。

夏六月以宋王成器等爲諸州刺史

帝素友愛爲長枕大被與兄弟同寢殿中設五帷與諸王更處其中謂之五王帳薛王業有疾帝親爲煮藥回飈吹火誤熱帝鬚左右驚救之帝曰但使王飲此藥而愈鬚何足惜羣臣以成器等地逼請循故事出刺外州乃以成器領岐州成義領蘭州守禮領號州範領濟州業領同州

### 秋七月焚珠玉錦繡於殿前

帝以風俗侈靡制金銀器玩令消毀以供軍國之用珠玉錦繡焚於殿前后妃以下皆毋得服罷兩京織錦坊後有胡人上言海南多珠翠奇寶命監察御史



楊範臣往求之。範臣奏曰：陛下前年焚珠玉錦繡，今所求者，何以異於所焚者乎？帝遂引咎，慰喻而罷之。

## 作興慶宮

宋王成器等請獻興慶坊宅爲離宮，許之。仍賜成器等宅，環於宮側。又於宮西南置樓，西曰花萼相輝，南曰勤政務本。

乙卯三年春正月，以盧懷慎爲黃門監。

懷慎清謹儉素，不營資產。妻子不免饑寒，所居不蔽風雨。姚崇謁告十餘日，政

事委積懷慎不能決惶恐入謝帝曰朕以天下事委姚崇以卿坐鎮雅俗耳崇既出須臾裁決俱盡頗有德色顧謂紫微舍人齊澣曰我爲相何如管晏澣曰管晏之法雖不能施於後猶能沒身公所爲法隨復更之似不及也崇曰然則竟何如澣曰公可謂救時之相耳崇喜投筆曰救時之相豈易得乎懷慎自以其才不及崇每事推之  
時人謂之伴食宰相

# 秋九月置侍讀官

侍讀之名始此

帝曰朕每讀書有所疑滯無從質問可選儒學之士入內侍讀每至閣門令乘

通鑑纂要卷四

三

肩輿以進聽于宮中乘馬親送迎之待以師傳之禮

丙辰四年春二月以倪若水爲汴州刺史

帝欲重都督刺史選京官才望者爲之然當時士大夫猶輕外任揚州採訪使班景倩入爲大理少卿過大梁若水餞之望其行塵久之謂官屬曰班生此行何異登仙

夏六月太上皇崩冬閏十二月姚崇寵以

宋璟爲黃門監

崇請避位薦璟自代璟爲相務在擇人  
隨材授任刑賞無私突厥默啜自武后  
世爲中國患至是默啜擊拔曳固爲拔  
曳固所斬時郝靈筌使突厥得其首自  
謂不世之功璟以天子好武功恐好事  
者競生微倖痛抑其賞逾年始授郎將  
靈筌慟哭而死○姚宋相繼爲相崇善  
應變璟善守法二人志操不同然協心  
輔佐唐世賢相前稱房杜後稱姚宋紫  
微舍人高仲舒博通典籍齊辭練習時  
務姚宋每坐二人以質所疑旣而嘆曰  
欲知古問高君欲知今問齊君可以無  
闕政矣

通鑑纂要卷之  
丁巳五年秋九月令史官隨宰相入侍羣臣

# 對仗奏事

貞觀之制中書門下及三品官入奏事  
必使諫官史官隨之有失則匡正美惡  
必記之御史彈百官服牙冠對仗讀彈  
文及許敬宗李義府用事政多私僻奏  
事官多候仗下於御座前屏人密奏諫  
官史官不復預聞武后以法制羣下諫  
官御史得以風聞言事互相彈奏於是  
多以險詖相傾宋璟爲相欲復貞觀之  
政制自今事非的須秘密者皆令對仗  
奏聞史官自依故事○隨從天子之儀

衛曰仗東北荒有獸名獬豸一角性忠見人鬪則觸不直者聞人論則咋不正者楚懷王嘗作牙冠名法冠一曰杜後惠文

辛酉九年春二月以宇文融爲勸農使

文融爲監察御史上言天下戶口逃移巧僞甚衆請加檢括源乾曜贊成之以融充使融奏置勸農判官十人分行天下使者競爲刻急州縣希旨虛張其數或以實戶爲客凡得戶八十餘萬田亦如之

夏六月罷中都先是改蒲州爲河中府置中都



通鑑紀事本末  
蒲州刺史陸象先政尚寬簡吏民有罪  
曉諭遣之嘗謂人曰天下本無事但庸  
人擾之耳苟清  
其源何憂不治

秋九月梁公姚崇卒

謚文獻

遣令佛以清淨慈悲爲本而愚者寫經  
造像冀以求福昔周毀經像而修甲兵  
齊崇塔廟而弛刑政一朝合戰齊滅周  
興汝曹勿效兒女子終身不悟追薦冥  
福道士見僧獲利效其所爲  
尤不可延之於家永爲後法

冬十二月安州別駕劉子立卒

子玄名知幾以字行領國史三十年鄭  
惟忠嘗問自古文士多史才少何邪對  
曰史有三長才學識世罕兼之故少初  
著作郎吳兢與子玄撰定武后實錄叙  
張昌宗誘張說誣證魏元忠事賴朱璟  
等激勵苦切故轉禍爲忠後說讀之謂  
兢曰劉五書魏齊公事不少假借奈何  
對曰兢實書之說屢以情蘄改辭曰狗  
公之情何如不錄卒不改世謂今董狐  
云○知幾行第五唐人多以第行相呼

壬戌  
十年秋八月始募兵充宿衛

初諸衛府兵自成丁從軍六十而免其  
家不免雜徭浸以貧弱逃亡畧盡張說

建議請召募壯士充宿衛不問色役優  
爲之制逋逃者必爭出應募帝從之旬  
日得精兵十三萬分隸諸衛更  
番上下兵農之分自此始矣

癸亥  
十一年夏五月置麗正書院

聚文學之士或修書或侍講以張說爲  
使有司供給優厚中書舍人陸堅以爲  
無益徒費欲奏罷之說曰自古帝王於  
無事之時莫不崇宮室廣聲色今天子  
獨延禮文儒發揮典籍所益者大  
所損者微陸子之言何不達也

冬十一月始置長從宿衛

選府兵及白丁一十二萬謂之長從宿衛一年兩番州縣無得雜役使

甲子十二年秋七月以內侍楊思勗為輔國

大將軍

宦者稱大將軍始此

乙丑十三年春二月更命長從宿衛為曠騎

總十二萬人分隸十二衛六番。曠苦廓反。滿張弩也。曠騎一曰射騎。後改曰羽林飛騎。每衛萬人。分為六番。番者更代宿衛也。

冬十一月封泰山。以王毛仲為開府儀

同三司

帝初卽位。牧馬有二十四萬匹。以毛仲  
爲閑廐使。至是有馬四十三萬匹。帝之  
東封。以數萬匹從。色別爲  
羣。望之如雲錦。故特加爵

車駕還至宋州

今歸德府

帝至宋州。宴從官。謂張說曰。卿者屢遣  
使臣分巡諸道。察吏善惡。今因封禪。歷  
諸州。乃知使臣負我多矣。懷州刺史王  
邱餽牽之外。一無他獻。魏州刺史崔沔。  
供帳無錦繡。示我以儉。濟州刺史裴耀  
卿。表數百言。莫非規諫。且曰。人或重擾

則不足以告成。朕常寘之坐隅。如三人者。不勞人以市恩。真良吏矣。顧謂刺史冠泄曰。比亦屢有以酒饌不豐訴於朕者。知卿不借譽於左右也。自舉酒賜之。

丁卯十五年春正月吐蕃入寇王君奭追擊

### 至青海西破之

初吐蕃自恃其彊致書用敵國禮帝怒張說言於帝曰吐蕃無禮誠宜誅夷但連兵十餘年甘涼河鄯不勝其弊今其悔過求和願聽款服以紓邊人帝曰俟與君奭議之說退謂源乾曜曰君奭勇而無謀常思僥倖吾言必不用矣及君



通鑑纂要卷之四  
奚入朝果請深入討之會吐蕃寇甘州  
焚掠而歸君奚勒兵躡其後及於青海  
之西破其後軍獲其輜重羊馬萬計而  
還君奚以功遷左羽林大將軍帝由是  
益事邊功

秋九月盜殺王君奚

己十七年夏五月以宇文融裴光庭同平

章事秋八月工部尚書張嘉貞卒

嘉貞不營家產有勸其市田宅者嘉貞  
曰此見朝士廣占良田身沒之日適足

爲無賴子弟酒色之資吾不取也

# 貶宇文融爲汝州刺史

融性精敏以治財賦得幸廣置諸使競爲聚歛及在相位謂人曰使吾居此數月則海內無事矣尋坐事貶死然是後言財利以取貴仕者皆祖之

庚午十八年夏四月以裴光庭兼吏部尚書

先是選司注官惟視其人之能否或不次超遷或老於下位光庭始奏用循資格無問能否選滿則注庸愚皆喜謂之聖書而才俊之士無不怨嘆

辛未十九年春正月王毛仲有罪賜死毛仲

初毛仲以嚴察幹力有寵百官附之輒  
轅毛仲嫁女帝問何須毛仲頓首謝曰  
臣萬事已備但未得客帝曰知卿所不  
能致者一人耳必宋璟也朕爲汝召客  
明日詔宰相與諸達官詣之日中璟乃  
至先執酒西向拜謝飲不盡卮遽稱腹  
痛而歸毛仲驕恣日甚時帝寵任宦官  
往往爲三品將軍楊思勗高力士尤貴  
幸毛仲視之若無人毛仲妻產子三日  
帝命力士賜之甚厚且授兒五品官毛  
仲抱兒示力士曰此豈不堪作三品邪  
力士歸奏之帝怒貶遠州追賜死自是

宦官勢

傾內外

癸酉二十一年春三月以韓休同平章事

裴光庭卒休代相休爲人峭直帝或宮中宴樂及後苑遊獵小有過差輒謂左右曰韓休知否言終諫疏已至帝嘗臨鏡默然不樂左右曰韓休爲相陛下殊瘦於舊何不逐之帝嘆曰吾貌雖瘦天下必肥蕭嵩奏事常順旨旣退吾寢不安休常力爭旣退吾寢乃安吾用休爲社稷耳非爲身也

冬十月分天下爲十五道置採訪使

京畿都畿關內河南河東河北隴右山  
南東西劍南淮南江南東西黔中嶺南  
凡十五道各置採訪使以六條檢察非  
法。一、強宗豪右田宅踰制。二、二千石  
侵漁聚斂。三、二千石不恤刑獄。四、二千  
石蔽賢寵頑。五、二千石子弟怙勢請託。  
六、二千石  
阿附豪強

甲戌二十二年夏五月以李林甫爲禮部尚

書同中書門下三品

是日大風拔木

林甫柔佞多狡數深結宦官及妃嬪家  
伺候帝動靜無不知之由是每奏對稱

昔時武惠妃寵傾後宮生壽王瑁太子  
浸疏薄林甫乃因宦官言於惠妃願盡  
力保護壽王惠妃  
德之陰爲內助

### 帝芟麥於苑中

帝種麥苑中帥太子以下親往芟之謂  
曰此所以薦宗廟不敢不親且欲使汝  
曹知稼穡  
艱難耳

秋七月以裴耀卿爲江淮河南轉運使置  
河口輸場



先是舟運江淮之米至東都含嘉倉餽車陸運三百里至陝率兩斛用十錢耀卿以江淮舟運悉輸河陰倉更用河舟運至含嘉倉及太原倉自太原倉入渭輪關中凡三歲運米七百萬斛省餽車錢三十萬緡或說耀卿獻所省錢耀卿曰此公家贏縮之利奈何以市寵乎悉奏以爲市糴錢

冬十二月幽州節度使張守珪斬奚契丹

王屈烈及可突干

時可突干連年爲邊患守珪屢擊破之可突干困迫遣使詐降守珪使管記王

悔就撫之。悔至而契丹初無降意。密遣人引突厥謀殺悔。悔知之。以牙官李過折與可突于爭權不協。說使圖之。過折夜勒兵斬屈烈。及可突于帥衆來降。帝美守珪之功。欲以爲相。張九齡曰。宰相代天理物。非賞功之官。帝曰。假以名而不使任其職。可乎。對曰。惟器與名。不可以假人。君之所司也。守珪纔破契丹。卽以爲相。若盡滅奚厥。將以何官賞之。乃以爲羽林大將軍兼御史大夫。牙官戎狄大臣之稱。奚厥。奚契丹與突厥也。

丙子二十四年夏四月張守珪使討擊使安

祿山擊奚契丹敗績

守珪使祿山擊契丹敗績。守珪奏請斬之。祿山臨刑呼曰：「大夫不欲滅奚契丹邪？」奈何殺祿山？守珪惜其驍勇，乃更執送京師。帝惜其才，勅令免官。張九齡固爭曰：「失律喪師，不可不誅。且觀其貌，有反相，不殺必爲後患。」帝曰：「卿勿以王夷甫識石勒枉害忠良。」竟赦之。祿山本營州雜胡，姓康氏，初名阿睢山，母再適安氏，冒其姓。後其部落破散，遂與安氏子思順逃來。狡黠善揣人情，守珪愛之，養以爲子。又有史宰干者，與祿山同里閭，亦以驍勇聞。守珪奏爲果毅，累遷將軍。

後入奏事帝與語悅之賜名思明。夷甫晉王衍字石勒上黨句奴人行見之識其有反相將收之勒已去矣後果叛阿犖山一作軋犖山突厥所謂鬪戰神也。一曰其母禱於軋犖山遂字之。牽音速。

### 秋八月張九齡上千秋金鑑錄

千秋節羣臣皆獻寶鏡九齡以爲以鏡自照見形容以人自照見吉凶乃述前世興廢之源爲書五卷謂之千秋金鑑錄上之賜書褒美

### 冬十一月賜朔方節度使牛仙客爵隴西

縣公

仙客前在河西能節用度勤職業倉庫充實器械精利帝嘉之欲加尚書張九齡曰尚書古之納言惟有德望者乃爲之帝曰但加實封可乎對曰封爵所以勸有功陛下賞其勤賜之金帛可也李林甫曰仙客宰相才也何有於尚書乃賜仙客爵食實封三百戶

裴耀卿張九齡罷爲左右丞相以李林甫兼中書令牛仙客同三品

初帝欲以林甫爲相。問於九齡。九齡對曰。宰相繫國安危。陛下相林甫。臣恐異日爲廟社之憂。帝不從。林甫引蕭晙爲戶部侍郎。晙素不學。嘗讀伏臘爲伏獵。中書侍郎嚴挺之言於九齡曰。省中豈容有伏獵侍郎。乃出晙刺岐州。時帝在位歲久。漸肆奢慾。九齡遇事力爭。至是以耀卿九齡阿黨。並罷政事。而以林甫爲中書令。仙客同三品。領節度。如故。帝卽位以來。所用之相。姚崇尚通。宋璟尚法。張嘉貞尚吏。張說尚文。李元絃。杜暹尚儉。韓休。張九齡尚直。各其所長也。林甫欲蔽主擅權。謂諸諫官曰。今明主在上。羣臣將順之不暇。烏用多言。諸君不



見立仗馬乎終日無聲而飮三品芻豆  
一鳴則黜之矣自是諫諍路絕林甫城  
府深密人莫窺其際好以甘言啗人而  
陰中傷之雖老奸巨猾無能逃其術者  
世謂林甫口有蜜腹有劍林甫欲除不  
附已者以吉溫羅希奭爲侍御史二人  
深刻鍛鍊時謂之羅鉗吉  
網○仗馬南衙立仗之馬

丁丑二十五年夏四月廢太子瑛鄂王瑤光

王琚而殺之

瑛原名  
嗣謙

帝之在藩也趙麗妃生太子瑛皇甫德  
儀生鄂王瑤劉才人生光王琚及卽位

幸武惠妃生壽王瑁麗妃等愛皆弛太子與瑤瑒以母失職有怨望語駙馬都尉楊洄尚咸宜公主常伺三子過失以告惠妃惠妃泣訴於帝帝怒欲皆廢之張九齡曰三子不聞有大過奈何一旦以無根之語廢之乎且太子天下本不可輕搖陛下必欲爲此臣不敢奉詔帝不悅惠妃密使宮奴謂九齡曰有廢必有興公爲之援宰相可常處九齡叱之以其語白帝帝爲之動色故九齡訖罷相太子得無動至是洄譖太子鄂王光王潛構異謀帝召宰相謀之李林甫對曰此陛下家事非臣等所宜預帝意乃決廢瑛瑤瑒爲庶人尋賜死

冬十月開府儀同三司廣平公宋璟卒

諡文

貞

戊寅二十六年夏六月立忠王璿爲皇太子

改名亨

太子璿旣死李林甫數勸帝立壽王瑁  
帝以忠王璿年長且仁孝恭謹又好學  
意欲立之猶豫不決自念三子同日誅  
死繼嗣未定常忽忽不樂高力士乘間  
請其故帝曰汝我家老奴豈不能揣我  
意力士曰得非郎君未定邪帝曰然對

曰大家何必如此虛勞聖心但推長而立誰敢復爭帝曰汝言是也汝言是也由是遂定尋更名紹又更名亨

### 秋九月冊南詔爲雲南王

南詔之先本哀牢夷地居姚州之西東南接交趾西北接吐蕃蠻語謂王曰詔先有六詔曰蒙舍曰蒙越曰越析曰浪穹曰漾備曰越澹兵力相埒莫能相壹歷代因之以分其勢蒙舍最在南故謂之南詔至皮邏閣浸疆大而五詔微弱乃賂劍南節度使王昱求合六詔爲一昱爲之奏請朝廷許之賜名歸義於是

以兵威脇服羣蠻不從者滅之遂擊破吐蕃徙居大和城其後卒為邊患

己卯二十七年秋八月追謚孔子為文宣王

先是祀先聖先師周公南向孔子東向坐制自今孔子南向坐被王者之服釋奠用宮縣追贈弟子皆為公侯伯

庚辰二十八年春二月荊州長史張九齡卒

帝雖以九齡忤旨逐之然終愛重其人每宰相薦士輒問曰風度得如九齡否

卒謚文憲

辛巳二十九年春正月立賑饑法

制承前諸州饑饉皆待奏報然始開倉賑給道路悠遠何救懸絕自今委州縣長官與采訪使量事給訖奏聞

○承前猶從前然始猶然後也

壬午天寶元年春正月以安祿山爲平盧節度使

時天下聲教所被之州三百三十一羈縻之州八百置十節度經略使以備邊凡鎮兵四十九萬人馬八萬餘匹開元前每歲供邊兵衣糧費不過二百萬天



寶後益兵侵多每歲用衣千二十萬正糧百九十萬斛公私勞費民始困苦矣

## 二月改官名

改侍中爲左相中書令爲右相尚書左右丞相復爲僕射東都北都皆爲京州爲郡刺史爲太守

## 癸未二年春正月安祿山入朝

帝寵待甚厚謁見無時李林甫領吏部尚書日在政府選事悉委侍郎宋遙苗晉卿時選人集者以萬計遙晉卿以御史中丞張倚得幸於帝擢其子襲爲首

羣議沸騰祿山入言於帝帝召人面試  
之奭手持試紙終日不成一字時人謂  
之曳白於是  
三人皆坐貶

甲申三年春正月改年曰載

乙酉四載秋八月以楊太真爲貴妃

初武惠妃薨後宮無當意者或言壽王  
妃楊氏之美絕世無雙帝見而悅之乃  
令妃自以其意乞爲女官號太真更爲  
壽王娶郎將韋昭訓女潛內太真宮中  
太真肌態豐豔性警穎善承迎帝意不  
暮歲寵遇如惠妃宮中號曰娘子凡儀

體皆如皇后贈其父玄琰兵部尚書以從兄銍爲殿中少監錡爲駙馬都尉

丙戌五載春正月貶韋堅爲縉雲太守皇甫

惟明爲播州太守

初太子之立非李林甫意林甫恐異日爲已禍有動搖之志而堅又太子妃兄也惟明嘗爲忠王友時破吐蕃入獻捷見林甫專權乘間勸帝去之林甫知之使楊慎矜密伺其所爲會正月望夜太子出遊與堅相見堅又與惟明會於景龍觀道士之室慎矜發其事以爲堅戚里不應與邊將狎暱林甫因奏堅與惟

明結謀欲共立太子堅惟明下獄林甫使慎矜等鞠之帝亦疑堅與惟明有謀而不顯其罪皆貶之親黨坐者數十人太子表請與妃離昏未幾堅與惟明皆賜死

秋七月加嶺南經略使張九章三品以王翼爲戶部侍郎

楊貴妃方有寵每乘馬則高力士執轡授鞭中外爭獻珍玩九章翼所獻精美九章加三品翼入爲戶部侍郎天下從風而靡民間歌之曰生男勿喜女勿悲

君今看女作門楣。妃欲得生荔支。歲命  
嶺南馳驛致之。嘗以妬悍不遜。送歸兄  
銛之第。帝遂不食。及夜。力士奏請迎妃  
歸院。遂開禁門而入。後復以忤旨遣歸。  
吉溫因宦官言於帝曰。陛下何愛宮中  
一席之地。使之就死。而辱之於外舍邪。  
帝亦悔之。遣中使賜以御膳。妃對使者  
涕泣曰。金玉珍玩。皆陛下所賜。惟髮者  
父母所與。乃剪髮一縑而獻之。帝遽召  
還。寵待益深。室以門楣宏敞爲壯觀。  
言楊家因生女  
而宗門崇顯也

丁亥  
六載春正月以安祿山兼御史大夫

祿山體充肥腹垂過膝外若癡直內實狡黠帝嘗戲指其腹曰此胡腹中何所有其大乃爾對曰止有赤心耳帝悅又嘗命見太子祿山不拜左右趣之拜祿山曰太子何官帝曰此儲君也朕千秋萬歲後代朕君汝者也祿山曰臣愚鄙者惟知有陛下一人不知乃更有儲君不得已然後拜帝以爲信然帝嘗宴勤政樓獨爲祿山於御座東間設金雞障置榻使坐其前命楊鈺姊娣皆與祿山叙兄弟祿山得出入禁中因請爲貴妃兒帝與貴妃共坐祿山先拜貴妃帝問何故對曰胡人先母而後父帝悅○障坐障也畫金雞爲飾



冬十二月以高仙芝爲安西四鎮節度使

仙芝本高麗人從軍安西累官四鎮節度副使自唐興以來邊帥皆用忠厚名臣功名著者往往入爲宰相李林甫欲杜邊帥入相之路以胡人不知書乃奏言文臣爲將怯當矢石不若用寒族胡人胡人則勇決習戰寒族則孤立無黨陛下誠以恩洽其心彼必能爲朝廷盡死帝悅其言始用安祿山至是諸道節度使盡用胡人精兵咸戍北邊天下之勢偏重卒使祿山傾覆天下皆出於林甫專寵固位之謀也

戊子七載夏六月以貴妃從兄釗判度支事

冬十一月以貴妃諸姊爲國夫人

釗後賜各國忠

釗不學無行善僇蒲諸楊引之見上得出入禁中善窺帝意以聚歛驟遷歲中領十五餘使恩幸日隆以貴妃姊適崔氏者爲韓國夫人適裴氏者爲虢國夫人適柳氏者爲秦國夫人三人皆有才色帝呼之爲嬖出入宮掖並承恩澤勢傾天下三姊與鉅錡五家凡有請託府縣承迎峻於制敕四方賂遺惟恐居後第舍壯麗一堂之費動踰千萬既成見有勝已者輒毀而改爲虢國尤爲豪蕩

庚寅九載夏五月賜安祿山爵東平郡王

唐將帥封王自此始

辛卯十載春正月爲安祿山起第於親仁坊

時祿山入朝帝命有司爲祿山治第但窮壯麗不限才力戒曰胡眼大勿令笑我祿山生日帝及貴妃賜予甚厚後三日召入禁中貴妃以錦繡爲大襪祿裹之使宮人以綵輿昇之帝聞問故左右以貴妃洗祿兒對帝帝自往觀之賜貴妃洗兒金銀錢自是祿山出入宮掖通宵不出頗有醜聲聞於外帝亦不疑也

二月以安祿山兼河東節度使

祿山既領三鎮日益驕恣見帝春秋高又見武備墮弛有輕中國之心養同羅奚契丹降者八千餘人謂之曳落河曳落河者胡言壯士也皆驍勇善戰一可當百又畜戰馬數萬匹以高尚嚴莊張通儒及將軍孫孝哲爲腹心史思明安守忠李歸仁蔡希德牛延珣向潤容李庭望崔乾祐尹子奇何千年武令珣能元皓田承嗣田乾貞阿史那承慶爲爪甲

壬辰十一載冬十一月李林甫死

帝晚年自恃承平遂深居禁中專以聲色自娛悉委政事於林甫林甫媚事左右迎合帝意以固其寵杜絕言路掩蔽聰明以成其姦如賢嫉能排抑勝己以保其位屢起大獄誅逐貴臣以張其勢自皇太子以下畏之側足凡在相位十九年養成天下之亂而帝不之寤也明年二月楊國忠說安祿山使阿布思部落降者証告林甫與阿布思謀反削爵剖其棺

以楊國忠爲右相

國忠裁決機務果敢不疑公卿莫不震懼或勸陝郡進士張彖謁之彖曰君輩

倚楊右相如泰山。吾以爲冰山。若皎日  
旣出。君輩得無失所恃乎。遂隱居嵩山。

甲午十三載春正月安祿山入朝

是時楊國忠言祿山必反。且曰。陛下試  
召之。必不來。帝使召之。祿山聞命卽至。  
見帝於華清宮。泣曰。臣本胡人。陛下寵  
擢至此。爲國忠所疾。臣死無日矣。帝憐  
之。賞賜巨萬。由是國忠之言不能入矣。  
太子亦言祿山必反。帝不聽。三月祿山  
辭歸范陽。帝解御衣以賜之。祿山驚喜。  
恐國忠奏留之。晝夜兼行。日數百里。自  
是有言祿山反者。帝皆縛送。由  
是人皆知其將反。無敢言者。



夏六月劍南留後李宓擊南詔敗沒

時宓將兵七萬擊南詔全軍皆沒楊國忠隱其敗更以捷聞益發中國兵討之前後死者幾二十萬人無敢言者帝嘗謂高力士曰朕今老矣朝事付之宰相邊事付之諸將夫復何憂力士對曰臣聞雲南數喪師又邊將擁兵太盛陛下將何以制之臣恐一旦禍發不可復救何謂無憂也帝曰卿勿言朕徐思之

乙未十四載春二月安祿山請以蕃將代漢

將從之

祿山使副將何千年入奏請以募將三十二人代漢將同平章事韋見素謂楊國忠曰祿山久有異志今又有此請其反明矣明日見素入見極言祿山反已有迹帝遣中使輔璆琳以珍果賜祿山潛察其變璆琳受祿山厚賂還盛言祿山無二心帝謂國忠等曰朕自保之卿等勿憂也

## 冬十一月安祿山反

祿山雖逆久以帝遇之厚故隱忍欲俟帝宴駕然後作亂會楊國忠屢以事激之欲其速反以取信於帝祿山反帝召宰相謀之國忠揚揚有德色

通鑑纂要  
以郭子儀爲朔方節度使十二月平原太

守顏真卿起兵討賊

安祿山賊真卿將兵防河津真卿遣平原司兵李平間道奏之帝始聞祿山反河北郡縣皆從賊嘆曰二十四郡曾無一人義士邪及平至大喜曰朕不識顏真卿作何狀乃能如是時朝廷徵兵諸道皆未至關中凶懼郡縣官多望風降走真卿召募勇士旬日至萬餘人論以討祿山繼以涕泣士皆感憤

常山太守顏杲卿起兵討賊河北諸郡皆

應之

祿山至藁城杲卿力不能拒會從弟真卿自平原遣甥盧逖潛告杲卿欲連兵斷祿山歸路以緩其西入之謀杲卿命藁城尉崔安石等徇諸郡云大軍朝夕當至先平河北諸郡先下者賞後至者誅於是河北諸郡響應凡十七郡皆歸朝廷兵合二十餘萬其附祿山者惟范陽盧龍密雲漁陽汲鄴六郡而已

丙申

十五載

肅宗至德元載

春正月安祿山僭號

自稱大燕皇

帝改元聖武

以許遠爲睢陽太守。賊將史思明陷常

### 山顏泉卿死之

時杲卿起兵纔八日。守備未完。思明等引兵至城下。杲卿晝夜拒戰。糧盡矢竭。城陷。賊執杲卿及長史袁履謙等。送祿山。杲卿罵曰。臊羯狗。何不速殺我。祿山大怒。并履謙縛而髡之。二人比死。罵不絕口。

以李光弼爲河東節度使

以郭子儀薦

二月真源令張巡起兵雍邱討賊

先是譙郡太守楊萬石以郡降安祿山  
逼巡爲長史使西迎賊巡至真源帥吏  
民哭於立元皇帝廟起兵討賊至雍邱  
身先士卒直衝賊陣大小三百餘戰賊  
遂敗走軍  
聲大振

夏四月郭子儀李光弼與史思明戰於九  
門敗之進拔趙郡五月戰於嘉山大破之  
復河北十餘郡六月哥舒翰與賊戰於靈  
寶大敗賊遂入關



時翰軍於潼關。或謂楊國忠朝廷重兵盡在翰手。翰若援旗西指。於公豈不危哉。國忠大懼。會有告賊將崔乾祐在陝兵不滿四千。皆羸弱無備。帝遣使趣翰進兵。復陝洛。翰奏曰。祿山久習用兵。豈肯無備。是必羸師以誘我。且賊遠來。利在速戰。官軍據險。利在堅守。請且待之。郭子儀。李光弼亦請引兵北取范陽。覆其巢穴。潼關大軍不可輕出。國忠疑翰謀已。言於帝。以賊方無備。而翰逗留。將失機會。帝遣中使趣之。翰不得已。撫膺慟哭。引兵出關。遇賊於靈寶西原。戰敗。乾祐執翰送洛陽。祿山以翰爲司空。

# 帝出奔蜀

司舒翰麾下來告急帝始召宰相謀之楊國忠首倡幸蜀之策帝然之黎明帝獨與貴妃姊妹皇子妃主皇孫及親近宦官宮人出延秋門妃主皇孫之在外者皆委之而去帝過左藏國忠請焚之帝曰賊來無所得必更歛於百姓不如與之無重困吾赤子至咸陽日向中帝猶未食民獻糲飯雜以麥豆皇孫輩爭以手掬食之須臾而盡有父老郭從謹進言曰祿山包藏禍心固非一日有告其謀者陛下往往誅之使得逞其姦逆致陛下播越草野之臣知有今日久矣

但九重嚴邃區區之心無路上達事不  
至此臣何由得睹陛下之面而訴之乎  
帝慰諭而遣之夜將半至金城縣民皆  
走驛中無燈人相枕籍而寢貴賤無以  
復

# 次于馬嵬楊國忠及貴妃楊氏伏誅

明日至馬嵬驛將士飢疲皆憤怒龍武  
大將軍陳玄禮以禍由楊國忠欲誅之  
會吐蕃使者遮國忠馬訴以無食軍士  
呼曰國忠與胡虜謀反追殺之并殺韓  
國秦國夫人帝聞誼譴杖屨出驛門慰  
勞令收隊軍士不應帝使高力士問之

立禮對曰。國忠謀反。貴妃不宜供奉。願  
陛下割恩正法。帝曰。貴妃居深宮。安知  
國忠反謀。力士曰。貴妃誠無罪。然將士  
已殺國忠。而貴妃在陛下左右。豈敢自  
安。願陛下審思之。將士安。則陛下安矣。  
帝乃命力士引貴妃於佛堂。縊殺之。輿  
尸寘驛庭。玄禮等乃免胄釋甲。頓首謝  
罪。軍士皆呼萬歲。於是始整部伍爲行  
計。國忠妻子及虢國夫人  
走陳倉。縣令薛景仙誅之。

## 發馬嵬留太子東討賊

明日將發馬嵬。父老遮道請留。帝命太  
子宣慰之。父老共擁太子。馬不得行。太

子乃使廣平王俶馳白帝。帝曰：「天也。」命分後軍二千人從太子。又宣旨欲傳位太子。太子不受。

○俶太子子

## 帝至扶風

帝至扶風。士卒流言不遜。會成都貢春綵十餘萬疋至。帝命陳之於庭。召將士諭之曰：「朕衰耄託任失人。致逆賊亂。常須遠避其鋒。卿等倉猝從朕。不得別父母妻子。跋涉至此。今聽卿等各還家。可共分此綵以備資糧。若歸見父母及長安父老。爲朕致意。各好自愛也。」因泣下沾襟。衆皆哭曰：「臣等死生從陛下。不敢。」

有貳帝良久曰去留聽卿自是流言始息

# 賊將孫孝哲陷長安

安祿山遣孝哲將兵入長安殺妃主皇孫數十人搜捕百官宮女送洛陽王侯將相家留長安者誅及嬰孩陳希烈與張均張珙等皆降于賊祿山以希烈珙爲相旣陷長安賊將日夜縱酒專以聲色寶賄爲事無復西出之意故帝得安行入蜀太子北行亦無追迫之患

秋七月太子亨卽位於靈武尊帝爲上皇



天帝以裴冕同平章事

靈武故城在寧夏衛城南

太子至靈武朔方留後杜鴻漸河西司馬裴冕等請遵馬嵬之命不許鴻漸等曰將士皆關中人日夜思歸所以崎嶇從殿下遠涉沙塞者冀尺寸之功若一朝離散不可復集願陛下免徇衆心爲社稷計牋上太子乃許之時文武官不滿三十人拔草萊立朝廷制度草創武人驕慢大將管崇嗣在朝堂背闕而坐言笑自若御史李勉奏彈之帝特原之嘆曰吾有李勉朝廷始尊

李泌至靈武

泌京兆人。玄宗使與太子爲布衣交。後隱居潁陽。帝遣使召之。謁見於靈武。帝大喜。出則聯轡寢。則對榻。事無大小皆咨之。欲以泌爲宰相。泌固辭曰。陛下待以賓友。則貴於宰相矣。乃止。

上皇至成都。賊將令狐潮圍雍丘。張巡討破之。

潮與巡有舊。於城下相勞苦如平生。潮因說巡曰。天下事去矣。足下堅守危城。欲誰爲乎。巡曰。足下平生以忠義自許。今日之舉。忠義何在。潮慚而退。圍守四

十餘日。朝廷聲聞不通。潮聞上皇已幸蜀。復以書招巡。有大將六人。官皆開府特進。白巡以兵勢不敵。且帝存亡不可知。不如降賊。巡陽許諾。明日堂上設天子畫像。帥將士朝之。人人皆泣。巡引六將於前。責以大義。斬之。士心益勸。城中矢盡。巡縛橐爲人。被以黑衣。夜縋城下。潮兵爭射之。得矢數十萬。其後復夜縋人。賊笑不設備。乃以死士五百斫潮營。潮軍大亂。焚壘而遁。追奔十餘里。潮慙益兵圍之。巡使郎將雷萬春於城上與潮相聞。語未絕。賊弩射之。面中六矢而不動。潮疑其木人。使諜問之。乃大驚。遙謂巡曰。向見雷將軍。方知足下軍令矣。

然其如天道何。巡謂之曰：君未識人倫焉。知天道未幾，出戰擒賊，將十四人斬首百餘級。賊乃夜遁。

### 以顏真卿爲工部尚書

郭子儀、李光弼引兵入井陘，真卿卽斂軍還平原。及聞郭李西入，始復區處河北軍事。以蠟丸達表於靈武。太子亦以蠟丸頒詔於江淮。由是諸道始知太子卽位於靈武，狗國之心益堅矣。

### 八月以郭子儀爲靈武長史，李光弼爲北

都留守並同平章事

子儀等將兵五萬自河北至靈武靈武軍威始盛人有興復之望矣

上皇遣使奉冊寶如靈武

靈武使者至蜀上皇喜曰吾兒應天順人吾復何憂制自今改制敕爲誥命韋見素房琯崔渙奉傳國寶玉冊詣靈武傳位

祿山取長安樂工犀象詣洛陽

初上皇每酺晏先設太常雅樂繼以鼓吹胡樂又教舞馬百匹啣杯上壽又引

犀象入塲或拜或舞祿山見而悅之至是命搜捕送洛陽宴其羣臣於凝碧池盛奏衆樂梨園弟子往往歔歔泣下樂工雷海清不勝悲憤擲樂器於地西向慟哭祿山怒支解之

九月以廣平王俶爲天下兵馬元帥李泌爲侍謀軍國元帥長史

建寧王倓英果有才略帝欲以爲元帥泌曰建寧誠元帥才然廣平兄也若建寧功成豈可使廣平爲吳泰伯乎今天下艱難衆心所屬在元帥若建寧大功



既成陛下雖欲不以爲儲副同立功者其肯已乎太宗上皇卽其事也乃以廣平王俶爲元帥帝與泌出行軍軍士指之竊言曰衣黃者聖人也衣白者山人也帝聞之以告泌曰艱難之際不敢相屈以官且衣紫袍以絕羣疑泌不得已受之帝笑曰旣服此豈可無名稱出懷中敕以泌爲侍謀軍國元帥府行軍長史泌固辭帝曰朕非敢相臣以濟艱難耳俟賊平任行高志泌乃受之

## 寶冊至自成都

韋見素房琯奉上寶冊帝不肯受羣臣固請帝不許真寶冊於別殿朝夕事之


如定省之禮帝以見素本附楊國忠意  
薄之素聞瑄名虛心待之軍國事多謀  
於瑄瑄亦以天下爲己任知無不言諸  
將拱手避之帝欲以張良嬖正位中宮  
李泌曰陛下在靈武以羣臣望尺寸之  
功故踐大位非私已也至于家事宜待  
上皇之命良  
涕由是惡泌


冬十二月安祿山遣兵陷潁川執太守薛  
愿長史龐堅殺之

帝問李泌曰今敵疆如此何時可定對  
曰以臣料之不過二年天下無寇矣帝

曰何故對曰賊之驍將不過史思明等數人今若令李光弼自太原出井陘郭子儀白馮翊入河東陛下軍於扶風與子儀光弼互出擊之彼救首則擊其尾救尾則擊其首使賊往來數千里疲於奔命我等以逸代勞來春復命建寧爲范陽節度大使並塞北出與光弼子儀南北犄角以取范陽覆其巢穴賊退則無所歸留則不獲安然後大軍四合而攻之必成擒矣帝悅

通鑑要卷十四











通鑑  
臨手  
要

DS

735

A2Y36

1761

v.9-10